

Kayëta iyanar Piyer in

Lilaya in

Akayëta aŋo ro Piyer yëgwën babi okëreceŋ od šapër bax gër Owun or Rom ok. Arixëra banëbi rixërand do bani sorond mbaŋ gayik aŋa ŋa këni end Yesu Kërisët eŋ. Piyer ga wël baxo end toro indebën eŋ, xwitanaxën babi mëne Kaxanu mbaŋ ye ko do aŋap yäpëk eni bayi ga xwëta këno. Afel fel babi bëte Kaxanu sana këbi eni gi bulunda ir bër fexën këbi Kërisët. Are re baxo bëte eni kemëna eni gi bela bër këŋo riyeninënd Kërisët, gayikako Angoc and Kaxanu aŋ gër ola orebën hi ko. Er ex gër akayëta in:

Ecëmar el: 1.1, 2.

End eyar ed apexa el, do gë oŋwënëk eŋ: 1.3-2.3.

End bulunda ir Kaxanu, end olëngw do gë ebuŋan ed gër toro eŋ: 2.4-25.

End eñër do gë ebalër gër aminëmëra eŋ: 3.1-22.

End toro ir ang Yesu Kërisët eŋ do gë end oyekax eŋ: 4.1-19.

Epëb ed bëlëngw bër gër amara el do gë eperëna el: 5.1-11.

Epelar el do gë ekaran ed benjekax el: 5.12-14.

Ecëmar el

1 ¹ Wëno Piyer, parëxanda ir *Yesu *Kërisët in këjun yëgwënëlinde wën bër sana këjun do šapër kën gër owar or Poŋ, gë Galasi, gë Kapados, gë Asi do gë Bitini bën. ² Faba Kaxanu kë nangënd beŋ bën dek damana ex gixën. Gë enang elo yata këjun gë epit ed fit këjun gë Angoc andexëm el, en tëfaxënënd endexëm eŋ do eŋun ŋunëtaxën gë oŋat or Yesu Kërisët eŋ. Awa cënarëlex de oyekax ol do gë obetak ol gër ola orewën!

End eyar ed apexa eŋ

³ Cëkwanëŋone Kaxanu, Sëm ir Axwën arebi, Yesu Kërisët. Gë axaŋënan isëm irexëm in rëw këbo gašëxe paß gë ekani ed Yesu Kërisët gër ecës el ene cotaxëne eyar ed gë aniyan el. ⁴ Mondako ri ko ene cotaxëne er din ax cësënd na in, er beŋa këbo in, er din ax buyarënd na in, er din ax nëngwëta na in. Kaxanu ejo fenin këjun yaŋ gër orën. ⁵ Wën këjun nëkonand gë panga ind Kaxanu iŋ, gë ekwëta ed xwëta këŋo el en cotaxën apexa and kë šanayaw gër baŋeŋ baŋelatar aŋ.

⁶ Ata wën mbaŋ kënjun nëngandërand ado ga yāpëk en caminara imëd në end batëy bandanjëm band hi kënjun gërëgako baŋ.

⁷ Batëy baŋo kë wāsinënd oxëbën or ekwëta edewën ol. Mën xëbënëk nëmëc kaŋe ir wënënëk xodux do kë nemind fo. Ado ga hi baŋun batëy baŋo, mondako bax ex gi eŋata ed ekwëta edewën el gë ecëkw, gë enjaran, do gë epëb, and ko ŝanayaw Yesu Kërisët aŋ. ⁸ Wën ahan han këno, ado bayik elod ano wat ex na. Gërëgako dën axwëta xwëta këno ado bayik ano watënd na, do aŝot ŝot kën onënga or gë enjaran, or ala dën ax kor na exo tēfēt. ⁹ Aŝot ŝot kën apexa and enjēw, and ex acosa and ekwëta edewën aŋ.

¹⁰ Ata apexa aŋo bani ŝaland gë obal osëm eni nang bëlawënel bër bax reyarand end oyekax or fenin kënjun Kaxanu eŋ.

¹¹ Mokemëna bani xemënanđ eni nang nand feye do bend fe fënëta ko Angoc and Kërisët and ebax gër ola orebën aŋ. Yama Angoc aŋo ga baŋi nangënënd nde gana-gana fo toro ind Kërisët iŋ do enjaran end ebax exo cot eŋ and ko fis aŋ. ¹² Kaxanu anangën nangën baŋi mēne wën xwënëk eyeyan ed lawëneŋu baŋi eni deyara el, ax gi bana ed faŋ baŋi bën bëlawënel. Bëfemëra bër Atëfëtan bën awëlaw fo wëlaw bani bebër kënun sëfëtanënd gërëgako gë panga ind Angoc Amënëk and xaniwëk gër orën iŋ. Gër beŋo këbi xacërand eni yëkwa omeleka ak ga yandi këbi eni nangëdo.

End owënëk eŋ

¹³ Awa yëlarayindën aye, giyin gë anjus, kwëtin dek eyar edewën el gër oyekax or kënjun wëlanëŋu *Yesu *Kërisët and ko ŝanayaw aŋ. ¹⁴ Ang obaŝ or këŋo baxëtënënd fo, këreŋun balënd na end oñandi od ŝot ban gër onangërarëxe orewën eŋ. ¹⁵ Barikan ang wën ko ar sana kënjun ak, wën bëte mēnin mondako fo gër bend kën rind yo. ¹⁶ Gayikako ayəgw yëgw këni: «Bëwënëk kën hi gayik wëno awënëk hi këme^a.»

¹⁷ Do angëmëne axëla këno xëland Kaxanu ang Sorix irewën fo, xarak mën këbi xitind bëla bën gë epitëndër këm, ala kala gë bebër ri ko bën, diyayindën gë anjiy and Kaxanu nand hi kën gër yeŋa na. ¹⁸ Enimin, anang nang kën mēne Kaxanu aŋun dacët ex na gë bebër kë nemind: gë kodı ba gë kaŋe. Gër ola or gë ofëcak këm, or rëweli kënun bëxarëk bërewën racët kënjun. ¹⁹ Barikan gë oŝat oxëbënaxik or Kërisët or racët kënjun oŋ, oŝat or ŝarëk ang or ifey iwënëk do iŋëngwëk, and ŝadaxa këno fo oŋ. ²⁰ Mën

ex ar sana këno Kaxanu gana-gana fo, d̄amana exo dixën ngwën an. Do mëḅ ŝanayaw ko gër baḅey baḅelatar baḅo në endewën na, ²¹ wën bër xwëta këno Kaxanu paḅ gë mëḅ bën. Kaxanu xanin këno gër ecës do yël këno enjaran eḅ. Mondako bax, ex gixën ekwëta edewën el do gë eyar edewën el gër Kaxanu.

²² Gayikako aḅwënënaya ḅwënaya kën ga ḅa kën d̄al in, en cotaxën aminëmëra and gë eññënax end ŝonayak këm aḅ. Awa balërindëleḅun mbaḅ andewën rewën aḅ, gë anjëlan ak d̄ek do gë emëkw epeḅax. ²³ Enimin, bër rëw këbi Kaxanu gaḅḅexe hi kën, xarak ax gi ex na d̄e gë eneda end kë ŝësënd, bari gë eneda end ax cësënd na, gë eyeyan ed din ir din ed gë aniyān and Kaxanu el.

²⁴ Gayikwa ala ar kë liyand yo,

ang andës fo hi ko,

d̄ek enjaran endexëm eḅ, ang opëtëfët fo ex.

Andës aḅ aḅaḅ kë ḅaḅënd

do opëtëfët ok aḅini kë ḅinind^b.

²⁵ Barikan eyeyan ed Axwën el, din ir din kë bayind.

Eyeyan elo ex Atëfëtan and nangën kënun aḅ.

End cale ingaḅax eḅ

2 ¹ Awa teḅin oxey or ex yo, osit or ex yo, egi ed bëḅyëñenax bër kë labayand el, oyëkëraxi ol do gë odena od ex yo.

² Ñandiyindëleḅun ang omër omënëk fo eyeyan ed Kaxanu el ang këbi ḅandind omër bëndoyer ak, en pirixën gër apexa, ³ gayikako anang dëḅ nang kën ang nënga ko Axwën ak.

⁴ Tëkayino ar ex ekaḅ ebëngw ed lap bani bela an. Xarak, mëḅ ex ed yata ko Kaxanu el, ed xëbënan këno el. ⁵ Ang këni barënd oxaḅ ex gi aciḅ ak, wën bëte barërin ang oxaḅ obëngw fo, en gixën Aciḅ amënëk, bëḅadaxan bëḅwënëk, eno dinaxënënd Kaxanu, paḅ gë Yesu Kërisët, ocaḅaxa od onden, od ko ḅana exo ḅanënd. ⁶ Gayikwa are rek gër Oñëgw Omënëk:

«Watin ga këme xwëtënd gër Siyoḅ ekaḅ ekëla,

elo sana këme, elo xëbënan ke.

Do ar kë ḅa endexëm an,

din aḅo cëfënan na^c.»

⁷ Awa ekaḅ elo këḅun yëlënd epëb el, wën bër xwëta këno bën.

Barikan gër bër aḅo kwëta ex na:

«Ekaḅ elo ex ed lap bani bëḅay' el

^b1.24 Esayi 40.9

^c2.6 Esayi 28.16

xarak mēj ex ekēla el^d.»

⁸ Do bēte:

«Ekaỹ elo kēni fokērēnd bela bēn,
ekaỹ elo kēbi rebēnd^e.»

Ga xey kēbi eni tēf eyeyan ed Kaxanu el, bēte gayik mondako bax ebi gi.

⁹ Barikan wēn cēj, er hi kēn andēwēra and sana ko Kaxanu, bēr gē ošadaxan or emun, enēng emēnēk, bulunda ir xwēn ko. Mondako hik en tēfētēraxēnēnd becērēcaxik bēnd ri ko ar nēcētēgu kējūn gēr ecamēdan do wēla kējūn gēr angoben akēbēnaxik andexēm an. ¹⁰ Wēn anēka hi kēn gērēgako bulunda ir Kaxanu, xarak akarēk aņ, an gi bana bulunda. Kaxanu abajo xaỹēnan na endewēn eņ. Barikan gērēgako axaỹēnan kējo xaỹēnanēnd.

¹¹ Wēn bēmaỹe bēnd ke balēnd mbaņ bējo, axara xara kēmūn gayikako bēr okucan, do bēliyer fo hi kēn, kemēnayin en kwēyēta oñandi od eman od kē wērelind enjēw ok. ¹² Mēlayayindēn šenene ola orewēn ol mērēxand ir bēr aņo kwēta ex na Kērisēt bēn. Do gēr ed kēnun nangašandērand, watindēlexēni bandixa banjekax bandewēn baņ, eno cēkwaxēn Kaxanu yatir kēbi hatēn.

End epēb ed owun eņ

¹³ Ang yāpēk gēr Axwēn ak, pēbindēn olēngw or ex yo. Pēbindēno emun eņ, mēj ar ex ar gapak an. ¹⁴ Pēbindēnēbi ogofērēner ok gayik emun eņ fana kēbi enēbi nēpēnd bēwēndēran bēn do enēbi cēkwand bēr kē rind benjekax bēn. ¹⁵ Enimin oñandi od Kaxanu ok ex, paḅ gē benjekax bēnd kēn rind beņ, eni cēmīnd bela bēsitarak bēn, bēr yoweỹ ax nang ex na bēn. ¹⁶ Diyayindēn ang bērēyāya fo, bari kēren dabayand na gē orēyāya olo en dixēn eñēnax eņ ado bayik yoweỹ aņun cēba ex na: giyin okadēp od Kaxanu. ¹⁷ Pēbindēnēbi bela đek, ŋanindēnēbi bēmaỹe bēņ, yēdayindēno Kaxanu, do pēbindēno emun eņ.

End oxēreceņ eņ

¹⁸ Wēn bēriyenin bēr gēr bēcīw bēn, yēdayindēnēbi bēxwēn bērewēn bēn do mayindēn endebēn eņ ado eni nemēri, bari ax gi ex na bēr bēngwēk do nēnga kēni bēn fo. ¹⁹ Gayikwa oyekax kēn šot ga buņa kēn buņand en toro nē end Kaxanu, gē amena kēm. ²⁰ Enimin, ašēkw nde kēno šēkwēnd ar kē buņand gēr toro nē end

^d2.7 Calemoñēw 118.22

^e2.8 Esayi 8.14

ga wëndëra ko an? Barikan angëmëne abuŋa kën buŋand në end ga kën rind benjekax, enjekax ex gër ogës od Kaxanu.

²¹ Në eŋo yataxën kënjun Kaxanu gayik Kërisët, mëŋ bête, mondako soro ko në endewën na, eno tēfētelixënënd, en tēfaxënënd banjēta bandexëm baŋ. ²² Bari mëŋ elod axo mendëra ex na,

bête elod ala ax wël ex na enëgwëš gër etëŷ edexëm.

²³ And bano širërand aŋ ababi wāša na, and baxo sorond aŋ, ala abaŋo wesa na.

Barikan asebën sebën këŋo amaša aŋ ar kë xitind šenene an.

²⁴ Mëŋ dëŋ lëbinak bamena bandebi baŋ gër eman endexëm and fika këno gër kërëwa

do šës ko në end beñëŋenax bendebi aŋ.

Mondako šës këne ene capëraxëne gë beñëŋenax beŋ, ene dīyaxënënde aniyān and šenene.

Gë tembaŷ indexëm iŋ kën fakaxënënd.

²⁵ Enimin, anëka hi ban ang oyel or nambërak fo^f.

Barikan gërëgako anëka baka kën gër ar ex axadac do anëkona arewën.

End eñër eŋ

3¹ Bête wën bësoxari bën, mayindën aŷa end bëcën bëndewën eŋ. Angëmëne mondako kën rind, axor kënëbi xor bëcën bëndëmar ado ga bani hëpënd end Kaxanu eŋ. Axor kënëbi xor gë eyeyan këm, gë ola orewën ol, ² angëmëne eni watënd gër aniyān andewën mëne aŷën wën kën do mëne wën afëb fëb kënëbi. ³ Oñañënarān odewën ok kërex gi na or fac: olap, gë baŋepe band kaŋe, gë bëŋwën bënd kaŋe, gë orëxër or kaŋe do gë banjëm bakëbënaxik. ⁴ Barikan gil ex lëf gër emëkw, oñañënarān od din ax biwënd na, od onden onënga, do ond angwëlëra. Ata oñañënarān od mondako ok, mbaŋ këŋo xëbënanënd Kaxanu. ⁵ Oye olo šot bani bësoxari bëwënëk bër angwën bën, bër xwëta baŋo Kaxanu bën ga banëbi fëbënd bëcën bëndebën bëŋ. ⁶ Gako Sara, afëb fëb baŋo *Abëraxam xali baŋo wacënd: «Axwën aram⁹.» Odënaŷ odexëm hi kën angëmëne ari kën rind benjekax beŋ, xarak er kën yëdand gebatak aŋun yëbun ex na.

⁷ Bête wën bëcën bëŋ, mëlayayindënëbi endëmane fo bolindaŷ borewën gër eñër edewën, ga nang kën mëne ola orebën ol ax këme na bon. Pëbindënëbi, gayikwa bën bête ašot këni šot

^f2.25 Esayi 53.4–6

93.6 Añanar 18.12

aniyan and ko yëlënd Kaxanu në end oyekax orexëm aŋ. Diyindën mondako, ata bayik yoweÿ ax bedi na cale indewën iŋ.

End ebalër eŋ

⁸ Awa wën wëlëringdën, balëringdëleŋun ang bër acël amat fo, cotindën anjëlän amat, bëngwëlex onden ondwën oŋ, banayindën. ⁹ Ax gi ex na momaşën eñëŋëanax eŋ gë eñëŋëanax, do ocir ok gë ocir. Ecëñëxët, karanindëñëbi benjekax bošandax, gayikwa në eŋo yataxën këŋun Kaxanu en cotaxën obetak or fenin këŋun ol. ¹⁰ Enimin, Oñëgw Omënëk ok ga rek:

«Ar yandi këŋo exo ŋan aniyan aŋ
do exo cot bakey banjekax an,
etëÿ edexëm el tebëlex odena ok,
do gë etitinaxën ed bela el.

¹¹ Kwëÿëtalexo beñëŋëanax beŋ
do diyindëlexo benjekax.

Calayindëlexo aketëxeta aŋ,
do kemëñayindëxelo exo ŋatën.

¹² Gayikwa bangës band Axwën baŋ anëkona këbi nëkonand
bër šenene bën,
do gë banëf bandexëm baŋ,

aŋaxët ko baxëtënd cale indebën iŋ.

Barikan ašus këbi šusënd bër kë rind beñëŋëanax bën^h.»

¹³ Do wën nobën cëŋ këŋun rinan eñëŋëanax angëmëne benjekax kën balëkënalind? ¹⁴ Ado enun toronënd në end or šenene eŋ, nëngandërayindëleŋun! Kërenëbi yëdand na do këreŋun bëlandërand na. ¹⁵ Barikan, pëbindëno Kërisët, mëŋ aŋwënëk an, ang Axwën fo, gër oŋëkw orewën. Giyindën laŋ bëwëlëk bër eno yakand kerët ar këŋun wëka yo eno pelëra ine kën yaraxënënd er kën yarënd in. ¹⁶ Barikan, yakayindën endëmane fo, do gë onden onjekax. Ata bër këŋun širërand në end ola or šenene or yël këŋun *Kërisët bën cëfënanindëlebi gër ed ebax enun yëlan yëÿ. ¹⁷ Enimin, pecanëleŋun en torond ga kën rind enjekax eŋ angëmëne mondako yandi këŋo Kaxanu, bari ax gi ex na ga wëndëra kën.

¹⁸ Gayikwa *Kërisët amat fo soro ko do šës ko në end beñëŋëanax, mëŋ ar šenene, në end bela bësëmbak, eŋun mëlaxën gër Kaxanu. Eman endexëm eŋ laŋ bani, barikan Angoc Amënëk aŋ xaninëgu këŋo abëngw. ¹⁹ Gë angoc andexëm aŋ yë baxo Kërisët ebi tēfētandërax endexëm eŋ bangoc band gër epëra baŋ.

²⁰ Akarëk aŋ, bangoc baŋo baŋo wëſenënd Kaxanu. Mëŋ abuŋan buŋan baβi xali fika ko Nowe Akuluŋ and fexaxën bani mëŋ gë bela bëcongëbëxi polo gër men aŋ. ²¹ Eŋo ex amatinali and xobuyi or këŋun fexënënd gërëgako el, bari ax dëxëtënd na abuyar ir eman in. Xobuyi olo onden onjekax ex gër lëngw ir Kaxanu paβ gë ekani ed Yesu Kërisët gër ecës el. ²² Mëŋ ex ar bakak y'aŋ gër orën do yëpax ko gand liw ir Kaxanu an, mëŋ ex ar këno baxëtënënd omeleka an, bangoc band wunëk baŋ do gë band gë panga baŋ.

End aniyan angaſax eŋ

4 ¹ Awa gayikako *Kërisët asoro soro ko gër eman endexëm, wën bëte giyin bëwëlëk ang bër emer fo en torond mondako fo. Gayikwa ar sorok gër eman endexëm an, anëka ſapër këni gë eñëŋënaŋ eŋ, ² exo ðiyaxënënd baŋeŋ band baŋi këŋo gër ebar baŋ ang këŋo yandind Kaxanu ak, ax gi ex na ang ex oñandi oñëŋënaŋ ak. ³ Enimin akarëk aŋ, gwac xwënda ban edi ed bebër ðan këni bër aŋo kwëta ex na *Kërisët bën: aſëk alakirand fo in, oñandi oñëŋënaŋ ok, ekureliran el. Ata wën monjëlaja ban yëlayand gër ñambëran in, gër oſëb ol, do gër ekëla ed olaſ el, xarak aſëba ſëbak. ⁴ Gërëgako aſaran këbi ſaranënd ga kënun watënd mëne an bo ex na ga kën xaſërënd gë bën gër eñac, mëŋ kënun renaraxënënd. ⁵ Barikan bën ayaka këno yakad ar yapëk eβi kiti bela bëbëngw do gë bëſëſëk an. ⁶ Enimin, mëŋ nangënaŋën këneβi Atëfëtan aŋ bëſëſëk bën dëŋ eni ðiyaxënënd gë Angoc and Kaxanu aŋ ang ak ado ga xiti këneβi ang ðek bela ak.

End oyekax eŋ

⁷ Ekwët ed beŷ ðek el anëka saxëguk. Awa giyin bërenik do bër gë anjus, en kemënaŋënënd gër cale. ⁸ Damana beŋo ðek, balëringdëleŋun mbaŋ andewën rewën aŋ, gayikwa aŋana aŋ alaβ kë laβënd beñëŋënaŋ bendanjëm. ⁹ Mëlayarindën aye ang këno wëlayand aliyer gër bëciw bëndewën ak, xarak an ŋunëŋunand na. ¹⁰ Ala kala diyenindëleβi boſandaw gë anjëla and yël këŋo Kaxanu, në end oyekax orexëm aŋ. Angëmëne mondako kën rind ata kën hi bër xwëtan këneβi banjëla band ko yëlënd Kaxanu në end oyekax orexëm. ¹¹ Ar yël këŋo eyey'an an, dey'arayindëlexo bend re ko Kaxanu beŋ. Ar yël këŋo edëcara ed bela an, dëcarayindëleβi gë ojaw od yël këŋo Kaxanu ok. Gër end ex yo, cëkwëndino Kaxanu paβ gë Yesu Kërisët, mëŋ ar gë enjaran do gë panga ind din ir din an. Amen!

End toro eŋ

¹² Wën bëmaŷe bënd ke balënd mbaŋ bëŋo, ga kën sorond ako, atëŷ añëkaxik ex, këreŋun caranënd na nangëde ax ñap ex na fo. ¹³ Ecëñëxët, nëngandërayindëleŋun ga kën sorond, ang soro ko Kërisët ak. Mondako ŷapëk ex gi eŋun nëngandëraxënëd nëmëc yatir ko nëcëtëgu ðek enjaran endexëm eŋ. ¹⁴ Ado enun cirërand në end oŷac or Kërisët nëngandërayindëleŋun, gayikwa Angoc and gë enjaran aŋ, and Kaxanu aŋ, gër ola orewën hi ko! ¹⁵ Barikan wën, gabatak kërexo torond na në end ga laŷ këŋo ala, në end ga rekara ko, në end ga ŷwendëra ko ba në end ga lil këbi bela gër bendebën. ¹⁶ Angëmëne ga hi ko këreceŋ ko soroxënënd, cëkwayindëleŋo Kaxanu në end oŷac olo, këreŋo cëfënanënd na. ¹⁷ Gayikwa anëka ĥatëguk kiti ind kë ŷana gër ekun ed Kaxanu iŋ. Xarak angëmëne gër ndebi kë ŷanand kiti iŋ, mondake kë ĥata gër bër ĥëpëk eni kwëta Atëfëtan and Kaxanu bën? ¹⁸ Ang rek Oñëgw Omënëk ak: «Angëmëne alak lakëk exo pexaxën ar ŷenene an, mondake cëŋ kë hi end asëmbak eŋ, do gë end aŷwendëran eŋⁱ?» ¹⁹ Awa bër kë sorond gër edi ed benjekax gayik Kaxanu ŷandi këŋo ebi gi mondako bën, tebayalexëni gër otaxan odexëm, mëŋ ar ex mokwëta an.

End emëlayan ed okëreceŋ eŋ

5 ¹ Awa bëlëngw bër ex mërëxand irewën bën ŷandi ke mëni pelëra gërëgako. Wëno dëŋ alëngw hi këme ang bën ak, sede ir toro ind *Kërisët hi keme, do bëte ahixeli këme hixeli gër enjaran endexëm and ko ŷanayawëgu aŋ. ² Kadacindënëbi ŷenene bër gër amara and xwëtënan këŋun Kaxanu bën. Nëkonayindënëbi gë emëkw el ðek ang ĥan ko Kaxanu ak, xarak ax gi ex na në end acosa fo, bëte ax gi ex na ga kënun nëŷalind. ³ Ola orewën ol gilex or këni xor eni tëfëtelind bër gër amara bën. Kërenëbi bëñand na nangëde wën xwën këbi fo. ⁴ Do and ko ŷanayaw alëngw ar bëxadac aŋ, aŷos këŋun ŷos gë ekamote ed owun ed gë enjaran ed din ir din el.

⁵ Bëte ocambenjar ok gë odënaŷ ok, baŷëtindënëbi bëlëngw bën. Banayindën gër banëkëra bandewën, gayikwa are rek gër Oñëgw Omënëk:

«Kaxanu ayël këbi yëlënd oyekax orexëm ol bër kë banand bën, barikan aŷwereli këbi ŷwerelind bër kë rafënanand bënⁱ.»

ⁱ4.18 Andorenik 11.31

^j5.5 Andorenik 3.34

⁶ Awa wën banayindën gër lëngw ir Kaxanu, mëñ ar gë panga an, eñun dafëñaxën and këño hatan añ. ⁷ Kwëtinayindën gër ndexëm dek bebër këñun sibänënd gër banjëlan bandewën bën, gayikwa mëñ afëÿëpëÿ këñun fëÿëpëÿënd.

⁸ Giyin gë anjus, këren nambinand na. Šabucara in, arangoÿëra ar gë wën an cëñ, abëtëra këñun bëtarand ga ko šaland noÿo këño ÿamb ang yërañ ir këño sisand emacar end këño ÿamb fo. ⁹ Ñjëpindën endexëm eñ do kemëñayin gër ekwëta ga nang kën ako mëne oyot od obat këñun wëcanënd gë bëmaÿe bëndewën bënd gër ngwën ro bëñ. ¹⁰ And kën soro imëd añ, Kaxanu mëñ ar gë oyekax an, mëñ ar waceli këñun enjaran end din ir din end ex gër Yesu Kërisët eñ, axanin këñun xanin, abašën këñun abašën ojañ ok do axemën këñun xemën en gixën bër rëd këbi aye. ¹¹ Mëñ ga xwënëk wa owun ol din ir din! Amen!

Epelar el

¹² Silas, imaÿe ind xwëta këmo gër Axwën in, rëca ke mun ñëgwënëli bepënëfëne beño. Aÿandi ÿandi ke me deÿa oyekax or dal or Kaxanu ol, mun kemëñaxën, awa kemëñayin mbañ!

¹³ Bërëwāk bër hik gër Babilon bën, bër yata këbi Kaxanu ang wën ak bën, këñun šëmand. Ašëma këñun šëmand bëte asëñiñwën Marëk.

¹⁴ Cëmarëxën momegar ang bëmaÿe bënd këbi balërend fo. Awa wën dek bër xwën këñun Kërisët bën, cotin obetak ol.